

玉

海

欽定四庫全書總目

玉海二百卷附辭學指南四卷

宋王應麟撰應麟有鄭氏周易註已著錄是書分天文律憲地理帝學聖製藝文詔令禮儀車服器用郊祀音樂學校選舉官制兵制朝貢宮室食貨兵捷祥瑞二十一門每門各分子目凡二百四十餘類宋自紹聖置宏詞科大觀改詞學兼茂科至紹興而定爲博學宏詞之名重立試格於是南宋一代通儒碩學多由是出最號得人而應麟尤爲博洽其作此書卽爲詞科應

用而設故臚列條目率鉅典鴻章其采錄故實亦皆吉祥善事與他類書體例迥殊然所引自經史子集百家傳記無不賅具而宋一代之掌故率本諸實錄國史日曆尤多後來史志所未詳其貫串奧博唐宋諸大類書未有能過之者何焯評點困學紀聞動以詞科詆應麟特故爲大言不足信也其書元時嘗刊於慶元路版已久佚今江寧有南京國子監刊本以應麟所著詩考詩地理考漢藝文志考通鑑地理通釋王會篇解漢制考踐阼篇解急就篇解小學紺珠

姓氏急就篇周易鄭註六經天文編通鑑荅問
等書附梓於後案明貝瓊清江集有所作應麟
孫王厚墓誌稱應麟著玉海未脫橐而失後復
得之中多闕誤厚考究編次請於閩帥鉉梓并
他書十二種以傳據此則諸書附梓實始於元
代惟瓊稱慶元初刻之時附書十二種而今爲
十三種慶元刊書原序亦言公書鉉於郡學者
凡十有四玉海其一則十三種爲不誤或清江
集傳寫之譌歟又卷首載浙東道宣慰司刊書
牒文稱玉海實二百卷而今本乃合辭學指南

爲二百四卷發郡文學李桓序所列卷目已與
今同疑卽當時校刊者所附入相沿已久今亦
仍之至他書之附刻者則各從其類別著於錄
焉其曰玉海者本於張融集名實則仿梁武所
集金海之例而變其稱也

宋史本傳

王應麟字伯厚慶元府人九歲通六經淳祐元年舉進士從王埜受學調西安主簿民以年少易視之輸賦後時應麟白郡守繩以法遂立辦諸校欲爲亂知縣事翁甫倉皇計不知所出應麟以禮諭服之差監平江百萬東倉調浙西提舉常平茶鹽主管帳司部使者鄭霖異待之丁父憂服除調揚州教授初應麟登第言曰今之事舉子業者沽名譽得則一切委棄制度典故漫不省非國家所望於通儒於是閉門發憤誓以博學宏辭科自見假館閣書讀之寶祐四年

中是科應麟與弟應鳳同日生開慶元年亦中是科
詔褒諭之添差浙西安撫司幹辦公事帝御集英殿
策士召應麟覆考考第既上帝欲易第七卷寘其首
應麟讀之乃頓首曰是卷古誼若龜鏡忠肝如鐵石
臣敢爲得士賀遂以第七卷爲首選及唱名乃文天
祥也遷主管三省樞密院架閣文字遷國子錄進武
學博士疏言陛下閱理多願治久當事勢之艱輿圖
蹙於外患人才乏而民力殫宜強爲善增修德無自
沮怠恢弘士氣下情畢達操綱紀而明委任謹左右
而防壅蔽求哲人以輔後嗣旣對帝問其父名曰爾

父以陳善爲忠可謂繼美丁大全欲致應麟不可得
遷太常寺主簿面對言淮戍方警蜀道孔艱海表上
流皆有藩籬唇齒之憂軍功未集而吝賞民力旣困
而重斂非修攘計也陛下勿以宴安自逸勿以容悅
之言自寬帝愀然曰邊事甚可憂應麟言無事深憂
臨事不懼願汲汲預防毋爲壅蔽所欺時大全諱言
邊事於是應麟罷未幾大全敗起應麟通判台州召
爲太常博士擢祕書郎俄兼沂靖惠王府教授彗星
見應詔極論執政侍從臺諫之臯積私財行公田之
害又言應天變莫先回人心回人心莫先受直言箝

天下之口沮直臣之氣如應天何時直言者多迂權臣意故應麟及之遷著作佐郎度宗卽位攝禮部郎官草百官表舊制請聽政四表已上一夕入臨宰臣諭旨增撰三表應麟操筆立就丞相總護還辭位表三道使者立以俟應麟從容授之丞相驚服卽授兼禮部郎官兼直學士院馬廷鸞知貢舉詔應麟兼權直俄兼崇政殿說書遷著作郎守軍器少監經筵值人日雪帝問有何故事應麟以唐李嶠李乂等應制詩對因奏春雪過多民生飢寒方寸仁愛宜謹感召遷將作監帝視朝謂應麟曰爲學要灼見古人心

應麟對曰嚴恭寅畏不敢怠皇克勤克儉無自縱逸
強以馭下制事以斷此古人之心然操舍易忽於眇
綿兢業每忘於游衍帝嘉納之旣而轉對言人君防
未萌之欲存不己之誠擢兼侍立修注官升權直學
士院遷祕書少監兼侍講上疏論市船不報會賈似
道拜平章事葉夢鼎江萬里各求去似道亦求去應
麟奏孝宗朝闕相者亦逾年帝亟取以諭之似道聞
應麟言大惡之語包恢曰我去朝士若王伯厚者多
矣但此人素著文學名不欲使天下謂我棄士彼盜
思少自貶恢以告應麟笑曰迕相之患小負君之罪

大遷起居舍人兼權中書舍人冬雷應麟言十月之
雷惟東漢數見命令不專姦竄竝進卑踰尊外陵內
之象當清天君謹天命體天德以回天心守成必法
祖宗御治必總威福似道聞之斥逐之意決矣應麟
牒閣門直前奏對謂用人莫先察君子小人方神疏
待班臺臣亟疏駁之由是二史直前之制遂廢以祕
閣修撰主管崇禧觀久之起知徽州其父撝嘗守是
郡父老皆曰此清白太守子也擢豪右省租賦民大
悅召爲祕書監權中書舍人力辭不許兼國史編修
實錄檢討兼侍講遷起居郎兼權吏部侍郎指陳成

敗逆順之說且曰國家所恃者大江襄樊其喉舌議
不容緩朝廷方從容如常時事幾一失豈能自安朝
臣無以邊事言者帝不懌似道復謀斥逐適應麟以
母憂去及似道潰師江上授中書舍人兼直學士院
卽引疏陳十事急征討明政刑厲廉恥通下情求將
材練軍實備糧餉舉實材擇收守防海道其目也且
言圖大患者必略細故求實效者必去虛文因請集
諸路勤王之師有能率先而至者宜厚賞以作勇敢
之氣并力進戰惟能戰斯可守進兼同修國史實錄
院同修撰兼侍讀遷禮部侍郎兼中書舍人日食應

詔論答天戒五事陳備禦十策皆下及用尋轉尙書
兼給事中左丞相留夢炎用徐囊爲御史擢江西制
置使黃萬石等應麟繳奏曰囊與夢炎同鄉有私人
之嫌萬石麤戾無學南昌失守誤國辜大令方欲引
以自助善類爲所排墜者必攜持而去吳浚貪墨輕
躁豈宜用之況夢炎舛令慢諫讜言弗敢告今之賣
降者多其任用之士疏再上不報出關俟命再奏曰
因危急而紊紀綱以偏見而拂公議臣封駁不行與
大臣異論勢不當留疏入又不報遂東歸詔中使譚
純德以翰林學士召識者以爲奪其要路寵以清秩

非所以待賢者應麟亦力辭後二十年卒所著有深
寧集一百卷玉堂類藁二十三卷掖垣類藁二十二
卷詩攷五卷詩地理攷五卷漢藝文志攷證十卷通
鑑地理攷一百卷通鑑地理通釋十六卷通鑑答問
四卷困學紀聞二十卷蒙訓七十卷集解踐阼篇補
注急就篇六卷補注王會篇小學紺珠十卷玉海二
百卷詞學指南四卷詞學題苑四十卷筆海四十卷
姓氏急就篇六卷漢制攷四卷六經天文編六卷小
學諷詠四卷

重刻玉海例言

一是刻凡遇

廟諱

御名

聖諱一律恭闕末筆

一是書初刻在元至正閒故宋代名諱或闕筆

或用代或已改從本字未能歸一今遵

欽定四庫全書攷證卷二十九通鑑地理通釋梓謹改

梓慎之例凡宋代諱悉改用本字不復闕筆

一是書久無善本茲刻謹遵

文瀾閣鈔本以舊元刻本校之並檢原引之書空

闕均已校補其無可補者僅闕卷一百二十二
第十一號一葉又闕四五字者計十餘處詳附
後校補王海瑱記以俟博雅匡所未逮
一附刻十三種若詩攷詩地理考通鑑地理通
釋漢制考六經天文篇六種則兼用津逮叢書
本學津討源本校小學紺珠則兼用日本國袖
珍本校周易鄭氏注兼用惠氏棟孫氏堂重輯
本校踐阼篇王會篇則以各本不戴禮逸周書
校急就篇一種津逮叢書學津討源本均存音
義而無補注近小學彙函則仍用康刻玉海本